

小峴山人詩文集

小峴山人續文集卷二

無錫秦 瀛波滄

。重脩松滋王侯祠記

明嘉靖中海內無事而倭夷孽芽其間蹂躪江浙所至
鼎沸攻劫名城百姓魚爛而無錫孤城獨完則松滋王
侯之功也。無錫故壯縣經元季兵燹城廢久不治侯莅
境召邑之父老而議從事焉或難之侯持益堅且督之
急閱三月工竣而倭猝至知城有備不敢窺而義士何
五路等爭先禦寇多以身殉倭遂退當是時倭勢方張
百里之內烽火震驚吾民賴侯先事而爲之防登陴乘

障寇至無患。民之於侯。其所以報侯者。宜何如哉。侯祠在錫山之麓。繡嶂街之西。創始於萬厯之季。蓋忠憲高公鳩資成之。而陳筠塘先生建兩廡以祀何五路等三十六人。久之祠就圯。華徵君劒光以乾隆十六年。嘗加繕治。規制庳陋。非復舊觀。無何徵君歿。積數十年榛蕪塞徑。荒穢滿目。會余歸自湖南。見而傷之。爲倡始集資葺祠宇三楹。廓其門亦三楹。屬女夫施會培經理之。而兩廡以費絀未及築。遽有粵東之行。逾年會培書至。請記重脩歲月。余惟祀典有功德於民。則祀之。能禦大患。則祀之。如侯者。誠爲無媿。至侯在無錫。嘗清釐田賦。除

積弊之爲民病者。此於侯爲小節。余官浙江時。有東海防同知張士楹者。松滋人。余詢以侯之子孫不甚顯。而其功赫然在人耳目。至今社而稷之。謂非侯之有以自致而能然與。祠經始以嘉慶八年九月落成。以九年三月何五路等姓名書於木。附祀云。

、架閣吳公祠堂記

全謝山祖望嘗言鼎革之際不事二姓以遺民終者應入忠節傳余於宋架閣金谿吳公而有感也公以德祐元年從文信國起兵江西爲司饌糴及空坑之敗護其部曲以歸宋亡終隱不出其事宋史不載僅見鄧光薦續宋書文丞相附傳而續宋書又不槩見公十五世孫嵩梁采輯家乘及郡縣志補撰事狀并乞翁覃溪方綱募信國與公手札刻之而以公祠堂之記屬余余惟宋季文山疊山皆以大節顯于江右而文山尤偉其徒謝翱以西臺一哭與林景熙諸人並稱浙東義士世之人

多樂道之。惟公沉淪鄉曲。史不之載。事遂佚而不傳。此謝山之所以致慨於史例之疎者也。顧余嘗拜鰲墓。求其後人。不得。而公獨有賢子孫。如嵩梁者。廣採舊聞。掇拾成編。俾有徵于後世。公之俎豆亦世守勿替。可不謂幸歟。余旣爲公記。復作享神之辭曰。

天水涸。宋命訖。文丞相柴市血。公後丞相而死。兮其精靈炯炯。與丞相而俱存。魂游八極。兮渺崖山之尺土。與會稽之嶙峋。翩然而歸來兮。驂白鳳而從文狸。俯西江之泯泯。公之距今。閱五百有餘年。兮信乎公之言也。過化者燭中之燄。而存神者明月之在天。

唐石嶺公祠堂記

善化唐君仲冕號陶山於余爲同年生相善也陶山曷以號以其先大夫石嶺先生嘗官山東平陰令會陶山先太宜人歿先生尋調昌邑罷職貧不能歸櫬卽葬太宜人於平陰鄰境肥城之陶山陶山不忘其母因以自號誌哀也太宜人歿後閱十九年先生沒於家葬善化白田鋪之柳樹塘旣而陶山成進士由吳縣知縣擢海州牧調通州先生之孫鑑以今年入翰林爲庶吉士孫曾林立其後嗣亦旣繁且熾矣方先生之宰平陰也縣有雲門山上官檄采山石助泰山工役先生慮擾民力

爭之事遂寢。善治獄聽斷若神。政寬厚而於盜賊獨嚴。賊爲隱語云。莫趕唐家莊。逾年堂無訟牒。野無逋賦。邑大治。比移昌邑。修王可隄。以遏濰水之衝。民利賴焉。先生雖沒而平陰人至今思之不忘。陶山以其母太宜人之葬於是也。歲時遣子姓墓祭無缺。今以嘉慶某年某月建祠於其地。曰唐石嶺公祠堂。而以太宜人配。固不獨陶山仁孝之思。抑亦先生魂魄是依。莊子所謂畏壘之民。社而稷之尸而祝之者。與先生諱某字堯章。石嶺其號。乾隆辛酉科舉人。爲學有根抵。著書甚具。務能發明聖賢教人之旨。太宜人姓譚氏。性節儉而篤於周卹。

勤婦事澣濯縫衽皆躬親之從任平陰猶日計筐績麻
不少休先生以子貴贈奉政大夫太宜人贈宜人
余嘗聞太宜人之葬山嶠高峻不可上其民數百人舉
棺而登蓋先生德政之入人深矣祠旣成陶山以治最
將入都便道展拜祠墓而先寓書於余屬爲祠堂記余
仰先生之治行與太宜人之賢而又重以陶山思親之
誠與夫平陰人舊德之感皆宜見之於文其亦可垂示
於無窮也夫

○蛟川書院崇祀記

慈谿鄭書常主敎鎮海之蛟川書院議以其鄉先賢沈
端憲黃文潔祀於院中以勸士之志於學者事旣舉寓
書京師請爲之記余惟道學之傳莫盛於宋余家無錫
自楊文靖倡道東南無錫因以有東林書院而顧高諸
君子卽構道南祠於其旁以祀文靖沈黃兩先生產於
蛟川皆能講明正學則蛟川之有書院兩先生其烏可
無祀夫文靖學宗伊川程子南宋以後朱子出而伊川
之學益昌明於時居敬窮理存心致知其立說萬世無
弊同時惟象山陸子其學與朱子稍異由是後儒有朱

陸異同之論。要之陸氏講學。鵲湖。其所以爲教。切實近
裏。並非專尙空虛。而朱子陸子。皆嘗游於浙東。浙東之
學者。各有師承。端憲文潔。其較著者。兩公得力所自。不
必苟同。而皆能自砥於學。以見諸立朝制行。學者稱之。
無異辭。譬諸水。然其源同出於正。百川之流。支分派別。
而無不同歸於滄溟而止。又何病於先儒宗派之殊與。
余老而廢學。繫官於。朝碌碌無所比似。年垂七十。方
將告歸田廬。與吾邑後進講明文靖之學。而力有未遑。
書常課士蛟川爲位。以祀兩公。春秋釋菜。與諸弟子講
道論德。蓋學之興也。有日矣。是爲記。

遂菴記

小峴主人於知過堂之西、顏其室曰遂菴。屬有二客過主人、甲問於乙曰：「先生沒於榮利、仕宦數十年、而常退然、若不有其官、年甫六十、其家非必有田宅之美、遽乞身歸、先生之志遂矣。」名菴曰：「遂得毋以是？」乙曰：「否否。」先生負其具、將有爲於時、雖官至廉訪使、其胸中蘊蓄、尙闕其施、若僅以乞身爲樂、毋乃淺之乎？」視先生、甲又曰：「如前之說、固不足以知先生矣。如後之說、則先生之所未遂者、正多也。」遂曷以名？甲乙不能決、乃以質諸主人。主人無以應、卽書其語、以爲遂菴記。

、秋窗課讀圖記

瀛幼無它師受經於先大夫督課甚嚴十三歲時先大夫入京師逾年歸課瀛如前嘗手十三經注疏序及馬端臨文獻通考諸序授瀛讀猶記一夕燈下讀漢書地理志夜半瀛稍倦先大夫怒而責之先淑人輒陪先大夫坐而課讀俟瀛睡始就枕今先大夫先淑人沒已二十餘年瀛服官中外常以文行自勉不至墜其家聲皆先大夫教也嘉慶十一年夏六月瀛官順天府府尹適嘉定嚴鉅來寓廨舍屬寫秋窗課讀圖圖中古松一株蓋數百年物瀛所居在邑中耆英里家有書樓有大樓

先大夫與諸叔父分列而居大樓者先大夫教瀛讀書處也數十年來人事不常瀛已遷居城西之虹橋撫圖增歎蓋有盡然不知涕之何從者已先淑人有乳母沈瀛幼時常隨之宿卽圖中之侍於先淑人側者也

慈竹長春圖後記

嘉慶十有五年冬武陵趙給事慎畛過余邸手持慈竹長春圖乞爲記圖蓋爲其母王太恭人作方作圖時太恭人自京師歸里尙健飯給事思其母致其願祝無已之意爰作是圖而長洲陳工部鶴爲之記閱三年給事典試江南而太恭人沒於家給事終天之痛無以更致其願祝每展圖涕泣而欲托於余文以申其仁人孝子之思烏虜其亦可哀也已太恭人少嫻母訓熟讀四子書孝經及列女傳諸書事親至孝歸贈公心菴先生贈公家貧贅於王太恭人謹事贈公而別購屋以奉先世

栗主旣而贈公歿督其子從外氏學婚娶成立給事登
上第入詞館以迄爲諫議知名當世太恭人爲父爲母
皆無歉於生前卽無憾於九原而給事亦可籍以稍慰
矣乎雖然人子之身父母之身也身一日而存卽心不
能一日而忘念余年四十餘相繼失怙恃迄今二十六
七年而余亦旣衰老蒙

天子厚恩許其乞身歸守邱壠此二十六七年中骨肉
之戚殆不忍言余無以自慰而又將何以慰給事耶特
太恭人嫺行不可無傳於世於是備書之作爲慈竹長
春圖後記

重修泰伯墓碑

南徐記稱泰伯宅東九里有皇山泰伯所葬地皇山卽鴻山其地爲無錫古梅里今析隸金匱縣山去縣城三十五里舊制冢高一丈四尺周三十五步晉太寧元年詔祀泰伯用王者禮殷師爲晉陵太守嘗表其墓置守冢一家唐宋以來興替無可考人或相傳爲吳王墩明宏治間國子監丞楊文作亭表之無何又廢萬厯之季邑人有事興舉忠憲高公爲文立石康熙中

聖祖時巡江浙親題匾額揭諸廟乾隆二年復奉特旨頒帑修治增建饗堂墓門我

國家尊禮往聖、推崇至德、厥典茂焉。越今嘉慶戊寅已
八十年、金匱令齊侯謁墓、見墓荒穢、謀治之。先釐其界
址、而後從事鳩賞召工、共糜金若干兩有奇、規制加廓
闊、數月告蒧。侯親致祭、聿觀厥成。粵惟泰伯三讓天下
民無得稱、孔子發微闡幽、而泰伯之所以讓者、卒未明
言之。後儒注釋、遂多穿鑿。讓商讓周、紛如聚訟。要之孔
子一稱周之德、一稱泰伯之讓、有周數聖人知天事、天
其心事不獨文王與泰伯無以異。卽太王季歷武王亦
與泰伯文王無以異。而釋者謂太王有翦商之志、太伯
不從。夫詩言實始翦商、乃太王肇基王迹之謂。不從云

者亦謂泰伯葬荆蠻不從侍太王寢膳而非謂不從剪
商之志也。余故不具論。特以吾邑習尚澆漓日遠於古
仁讓之風邈然。忠憲記中已有慨於人心風俗之衰。方
今士大夫貪利忘義。天倫骨肉間貴侮賤。少陵長錐刀
之末動相詬厲。流失敗壞更有甚於忠憲記中所云者。
侯之爲治更化善俗。思有以革其涼薄之行。後之人仰
聖朝之盛典。緬平墟之遺跡。亦當於侯是舉有所觀感
於無窮也。侯名彥槐。婺源人。己巳進士。由庶吉士改今
官。墓縱橫脩廣丈尺。與夫添置旁舍及種植松柏之屬。
宜見于侯自爲記。勒諸碑陰。辭曰。

於惟泰伯端委治吳梅里啟疆古稱平墟宅斯葬斯皇
山之陽孔碩孔廡有堂有皇久而弗治乃卽于荒豐草
無弗我心曷降我侯蹙然爰舉是役是究是度是畚是
築釐彼疆土禁彼樵牧山陵崇隆鎮是巖谷告成于伯
伯其歆只潔爾牲牢饌爾酒醴惟侯之誠妥靈揭虔桓
碑有屹於昭萬年

重建臨川縣石橋碑

臨川隸撫州爲首縣縣治東門外舊有石橋水門十二橫跨汝江地當四達之衝常被水故工易毀行者病焉橋建於宋嘉泰中規制屢易自乾隆五十五年橋圯閱十餘年未有治者嘉慶八年郡守邱君滋畬臨川令來君虹橋始蠲俸緡爲倡旁縣之隸于撫者悉助之而屬邑中在籍知縣洪君星煥教諭李君昇主其役僉議甕門視舊加二尺共高二丈八尺有奇并鑑曩者水修之失內外皆發巨石爬沙下櫃其制實倍密於舊而工費繁鉅久之弗究厥施嘉慶十一年余弟沆承乏臨川爰

咨爰度親臨相工在事諸君踴躍爭赴衆役畢臻越十
四年某月某日工訖凡糜金若干兩諸君因余弟乞余
爲文記其事余乃喟然歎曰橋梁水利守土吏職也顧
微藉羣力常不能底於成往余官浙江嘗勤勤於興學
課農以及設舟車便行旅諸事浙人慕義歡然循從比
告歸家居頻歲見前人成蹟多廢壞每諭諸令令不之
應而邦人亦多撓之今觀於茲橋之成積數年之力卒
以克藏鉅工冠蓋商賈之經于是者忻忻然無病涉之
患殆余弟督之而諸君實共成之是不可以無述橋舊
名文昌或謂豫章星紀之次撫郡當斗中應太微垣文

昌二星是以北宋以來名賢輩出稍諸志乘多引其說
余姑弗論而第紀重建落成歲月泐諸石俾後有徵辭
曰

豫章之域撫爲名邦環闔而東跨江架梁魚鱗雁齒洪
瀾用障樅以巨珉縣如長虹暴漲橫溢頻潰厥防歷有
歲年是鳩是程迺礱迺築用省厥成勿厲勿揭孔堅孔
貞上應天象文明之祥

、封中憲大夫浙江溫處兵備道青上李公墓表

吾友前雲南按察使李君鑾宣以嘉慶十一年冬獲譴遠戍余送之按察君以父青上公年耆泣涕沾襟其明年公卒於家又逾年而按察君蒙

恩赦還則過余而泣曰先考之沒鑾宣方荷戈萬里外今奉

命歸里持服敢以它日墓石之文爲請今年六月鄴行狀并告葬期徵前諾不可辭公姓李氏諱學夫字青上靜樂人其遠祖自江南鳳陽遷於晉祖之檀貢生官高鄴州知州祀名宦鄉賢父璋康熙癸巳舉人歷太平池

州淮安府知府終淮南儀所監掣同知兩世皆以治行聞公於兄弟行爲最幼生妣沈太恭人出也家世清宦而其先遺貲故豐伯兄以家督獨持之公無所授置不問居平儉約布衣糲食不飲酒無樗蒲之好嘗需次部寺司務久不得官歸益困而戚友中或負公金不責償按察君生而岐嶷沈太恭人親教之書太恭人沒公哀毀盡禮按察君旣成進士授刑部主事迎公至京師按察君任事勇而性平恕脊於刑獄公色喜不數年按察君出爲浙江溫處兵備道溫多海患每獲盜親鞫之活難民無算處州大水道殫相望請於大府出粟賑濟皆

公之教也逾六年擢雲南按察使公常慮按察君下急疎中恐及於禍無何竟以平反龍世恩之獄爲憾者所中遽有塞外之役按察君踉蹌告別而公亦隨沒矣公卒以嘉慶十二年六月十一日年七十歲配合河孫氏繼喬氏並贈恭人先卒子二長卽鑾宣乾隆庚戌進士雲南按察使孫出次掄宣側吳出女二適郭樹培舉人閻士驥俱吳出孫復觀掄宣嗣子始余以杭嘉湖道權臬事於浙適按察君備兵溫處亢直不爲同列所喜余獨與交善洎官雲南其獲譴之繇亦惟余知之按察君家傳清白稟公之教而又承其外氏合河孫文定之遺

訓用能立身居官。矯然自別於流俗。方今

聖天子錄用正人。按察君必當復爲

朝廷用。惜公之不及見。而亦可以慰公於九原矣。按察
君以嘉慶十四年九月十三日葬公縣東之凌華岡。孫
太恭人早世。先葬於縣之段家寨。歲久不可遷。今葬公
乃奉太恭人衣冠之櫬。暨喬太恭人之柩。附焉。按察君
竊以爲疚。余告之曰。先王父資政公。壽至八十有六。而
先王母呂太夫人早世。耐葬先隴已五十餘年。未得合
兆。殆吾兩家有同此痛者。遂并書於石。

○原任翰林院編修洪君墓表

嘉慶四年陽湖洪君稚存方官翰林上書王大臣言事乞轉奏奏上

上命軍機大臣鞠之下於理擬重辟

上賞其死罪遣戍伊犁閏二年京師旱

特頒詔旨赦之還君歸八年以疾卒於家年六十有四君諱亮吉初諱蓮又諱禮吉字君直一字稚存號北江晚號更生而稚存之名特著其先歙縣人遷武進今析治爲陽湖人曾祖璟拔貢生山西大同府知府崇範名宦祖公案國子生妣贈儒林郎贊武進趙氏遂遷焉父

懃國子生累贈奉直大夫娶蔣氏贈宜人。是爲君妣。君生六歲而孤。隨蔣太宜人僑居外家。就塾讀書。甚穎慧。每夜蔣太宜人親課之。爲訓解字義。於制舉文字外。并好爲詩歌。輒驚其老輩。年二十四。補博士弟子員。旋中本省鄉試副榜。年三十五。始中順天鄉試舉人。又闕十年。成一甲第二名進士。授編修。逾兩年。充順天鄉試同考官。尋奉

命視學貴州。旣事還。朝適楚黔教匪煽亂。蔓延秦蜀。會

高宗純皇帝大考翰詹等官。試題爲征邪教疏。君力陳

內外弊政數千言。慮紙竟雙行書之。

高宗純皇帝方欲用君。而君仲弟某訃至。君亟移疾歸。無何。

先帝登遐。君以奔。

國喪詣京師。時楚蜀軍事孔棘。

上焦勞特甚。君遂有上書主大臣之事。方君書上。禍不測。旁觀皆危之。而。

聖主鑒其惻怛。卒用保全。其出都門。送者爭致饋遺。爲泣下。而君恬然遠行。蓋亦知。

上求言求治。不久棄君於荒外。而君之慙直。得見宥於。

聖明實爲千古不易得之遭逢也。君生平於學無不窺
著述甚多其刊行者有卷施閣集若干卷、三國疆域志
若干卷、十六國疆域志若干卷、乾隆府廳州縣志五十
卷、附結軒卷施閣二集若干卷。君性過人事蔣太宜人
至孝太宜人沒君方在處州家人先以病告歸至郡城
之八字橋得凶問失足墮水幾死篤愛諸弟存沒無間
娶蔣氏封宜人有婦行先卒子飴孫舉人符孫胙孫
齡孫女二嫁娶皆士族孫穀曾彪曾宛曾殤曾序曾
孫女一君以嘉慶十四年四月二十二日卒以是年十
一月二十四日葬於武進縣德澤鄉前橋祖塋之昭其

同年友無錫秦瀛爲之表其墓

、山東泰安府知府沈君舫西墓表

沈君舫西既葬之明年其孤如銘以書抵京師乞爲表墓之文余與君久故方哀君之沒而君生平居官亦自有不可沒於後者爰不辭而爲之以歸其孤刻之石君諱琨字兼三號舫西歸安人沈於吳興爲右族曾祖涵康熙丙辰進士歷官內閣學士祖柱臣康熙甲午舉人廣東試用知縣父榮昌乾隆乙丑進士歷江西督糧道妣姚氏封恭人是生君少負絕人之姿爲詩文輒工乾隆辛卯中式順天鄉試舉人芮申官內閣中書旋在軍機處行走丙午授廣東佛山同知丁父憂服闋仍補中

書遷工部主事。歷員外郎、郎中。擢陝西道監察御史。掌京畿道。授山東泰安府知府。逾六年。以病告歸。歿於徽州之紫陽書院。方君之在軍機也。與余同直。隨人步趨。無表暴。余輒易視君。比爲御史。方值

今上親政。闢言路。君遇事直陳。刺舉無所避。其最著者。蘇州總捕同知李焜。以嫌捕繫諸生。牽連下獄。君奏白其冤。劾常州府知府胡觀瀾。及鹽政家人高姓不法狀。復請令司道大員。毋得籍軍興奪情。各直省倉庫虧缺。不宜責令見任。彌補。人咸韙之。時敘匪未靖。

上將詣

盛京謁

陵君上言請展期。方穀鯨待罪。竟從君言。余始自愧向之未能知君。而服君之能不媿其官也。君既出守泰安。先叔父蓉莊公方官濟東。泰武臨道。君爲所屬會水決。大清河蠲賑之事。悉以委君。而君遽以病告。嘉慶九年三月。余入都。過泰安。君已去職。握手道故。君固無病也。十年九月。余道揚州。見君於梅花書院。則羸然疋瘠。而君家貧。籍脩脯自給。乃又就紫陽之聘。而沒沒之歲。爲嘉慶十三年四月二十七日。年六十有四。余因念君曩直軍機。其與君同直諸人。多出入爲太官。惟君僅知一

郡然諸人中能有以自見不朽於世者蓋寡則後世視君其爲輕重何如也君好爲詩文詩尤工著有小筠樓詩集十六卷文集三卷奏議一卷娶章氏監察御史寶傳女封恭人先君卒子如鎔徐州府通判寵嘉殤女二適候選訓導章璵候選縣丞姚紹嘉孫二元冲殤長源孫女三人如鎔以嘉慶某年某月合葬君與章恭人於歸安之某原

州通判震西陳君墓表

吳縣陳純篤學有文持其先大父震西君璞山子傳示
余乞爲文立石於墓於是君之歿已二十有四年矣君
姓陳氏諱璽震西其字自號璞山子其先世於明之中
葉自常熟徙居郡城遂爲吳縣人祖時憲州同知舉鄉
飲賓父又恕州同知妣戴安人君少穎敏好讀書年未
冠父沒於京師君以孤子措拄門戶治生計舟車南北
未嘗一日廢學入監爲國子生屢試不讐遂棄時文之
業專肆力於詩循例當得州通判君喟然曰母老矣奚
忍以官廢養乃不復就選人家居奉母杜門不出君由

是詩益工與郡中詩人游朋儕過從酬酢無虛日居恒
敦孝友之行中歲家門多故常抑鬱不自得其後諸子
皆成立始得從容嘯歌以爲樂君旣工詩又好爲長短
句酷似北宋人少時嘗從倪頤塘學頤塘稱其詩娟娟
靜好最近丁卯昭諫一流璞山子傳者卽頤塘之弟舉
人廷元爲君作也時君年未老廷元采君詩入其所輯
和羹集因論次而爲之傳娶吳氏有賢德先君五年卒
君卒以乾隆四十九年某月某日年八十有五合葬于
吳縣吾家山烏塢吳中習尙風雅而飭躬勵行之士亦
往往出乎其間自前明以來見於紀載者不乏也陳氏

世有令德。君居幽處。下名不出里閭。而績學工詩。其內行亦有足多者。潛德之光。宜將發聞于後。願歷再世。而猶未顯。融昌大者何歟。君生子三人。長宗江。卽純之考。官江西貴溪縣縣丞。屢攝縣事。所至循績甚著。以憂歸。不復仕人。咸惜之。與其配蔣孺人俱附葬吾家山之昭純友。顧曾志之。次某亦從葬。例得具書。又次某女適某孫士樸。早卒。純山東濟南府經歷。

贈武選司員外郎瑩臺凌君墓表

嘉慶十有四年

天子宏錫類之仁

詔內外大小臣工並得推恩所自封贈如制繇是兵部
武選司員外郎凌鳴喈獲贈其父瑩臺君如鳴喈官逾
六年鳴喈先以言事鐫級還里追念其父之葬禮弗備
治而新之而以隧道之文請於余君姓凌氏烏程人系
出東漢校尉操遠有端緒明季有官大理寺卿殉甲申
之難諡忠介諱義渠者君祖父行也祖義徵考贈朝議
大夫景璇妣贈恭人閔氏生子三人君最幼三歲而孤

家甚貧日不再食十歲就塾數月而輟十四五歲知好學而無師聞隣師閔松如爲其弟子講說君從戶外竊聽松如喜而進之旋以主人忌遂止年十八始讀四子書無師授而於里中學徒轉相傳述年二十一經傳皆成誦卽授徒而以其館穀奉母學舉業數年年三十二補博士弟子員尋丁閔恭人憂閔恭人方疾亟時醫者言當急進葢餌君無可爲計疾走百里外謀於其友之家震澤者竟得之以歸而閔恭人竟不起居喪哀毀盡禮治窀穸還往省視如生時年四十二始娶於孫連舉二女而生鳴喈君年已五十矣時君精於針灸之術活

人無算遇貧乏者施以方藥不受值而孫恭人善飼蠶
君於宅旁隙地種桑成林蠶桑之入藉以自給鳴喈少
穎慧君親課之稍長教以前明金正希黃陶菴諸君子
爲文之法而黜項煜周鍾之文顧不及見鳴喈之成名
而歿此鳴喈罔極之思所繇終身哀痛而不能已也君
生平篤學勵行勤勤於省身寡過嘗著書二卷卽以寡
過名篇其書頗近朱子之近思錄而君能躬行不倦非
僅以資學者之談說也君卒以乾隆己酉年閏五月十
六日年六十有九配孫恭人國學生立本女年二十九
始歸君君家方窶艱躬執縫紉浣濯之役辛勤劬瘁爲

人所難比君沒教鳴喈尤嚴以是鳴喈奮志爲學早以
文行知名於時後君三年卒時爲乾隆壬子年三月十
二日年六十有五子一卽鳴喈嘉慶庚申舉人壬戌進
士兵部武選司員外郎女二一殤一適閔惇典孫四江
國學生候補鹽大使早卒莖國學生希曾殤佛保幼孫
女一曾孫女一墓在烏程縣常樂鄉晨舍村之原

廣東城守協副將唐君墓表

君姓唐氏諱光茂字文燦一字奇山祖籍武陵父某官鎮軍鎮左營把總遂家於鳳皇廳母某氏實生君以君貴封父爲將軍母封人君少負大志嫻弓馬好

讀書嘗募郭定襄戚少保之爲人家貧事親孝甘毳之奉必竭其誠而於兄弟尤友愛終身靡間慷慨好交遊胸無柴棘見人有過輒密規之而稱善廣坐以緩急告者巨細必應由行伍累拔鎮軍鎮標前營外委把總乾隆三十七年金川不靖隨襄陽鎮總兵馬全於軍營擢湖北施南協千總奪碉剿賊累著功績兵部給功劄七

張尋調乾州陞永州鎮標右營守備遷寶慶協都司五
十七年湖廣總督畢公保舉軍政卓異擢廣東右翼鎮
標左營游擊嘉慶二年兩廣總督吉公檄赴廣西西隆
州剿禦黔苗楊各險巢憂歸滾馬亞橋等處時粵兵爲
諸軍冠君實親督之事竣吉公以君首功入告擢廣東
撫標左營參將七年惠州匪徒陳亞本構亂君帶兵進
攻羊屎山雷公嶺

御賜琺瑯翎管玉扳指火鑷色等物

上特命大臣至粵督辦檄君赴博羅料理賑恤事務旋
又隨赴永安督緝餘匪攻破山巢殲擒甚夥部議功加

一等級功創一紙奉

上諭賞戴花翎君在粵十數年熟知嶺海數千里地方險夷而於各營將弁之能否士卒之強弱莫不諳悉前後大府一倚君爲重尤能約束弁兵軍行無犯十年由黃岡協副將調廣州城守副將署廣東右翼潮州鎮總兵事是年余以司臬粵東始識君屬制府設軍工局令文武大員總司讞事而多派冗散之員雜治之由是希望風旨獄多清亂君爲制府所簡意弗善也適韶州有兵民互鬪之案君力請去遂假韶州鎮總兵印以行七月余離粵逾年而君病沒蓋嘉慶十一年九月九日也

年六十有三配鄭氏直隸正定鎮右營遊擊恂女贈淑人繼洪氏太學生廷選女朱氏處士大義女並封人子惇乾隆乙卯科武舉人守禦所千總洪出恒側黎氏出女二人皆洪出長字洪思敬分發廣東候補從九品次字洪祖堯烏庠余識君較晚見其人恂恂謙雅有古儒將風與之議論多切於事情韶州之獄余親鞠之君於百姓無所牽染是亦賢矣其孤惇等旣以嘉慶某年某月某日葬君於武陵縣某鄉之原而其甥拔貢生胡持狀乞余表君墓其亦於余言有徵也

古心翁沈君墓表

華亭沈君以耆年宿德見重於其鄉吾友長洲王惕甫
芭孫嘗爲君作古心翁傳其所以稱君有漢故民吳山
金善善道人左光慶之遺風云君年八十二考終其孤
恕等葬君莘莊之原惕甫復銘其壙而以書郵君行狀
來京師屬余表墓按狀君諱虞揚元昆其字自號古心
翁其先世居桐鄉之時山曾祖均遷松江均生士榮
贈儒林郎士榮生時英 贈奉直大夫是爲君父君少
困童子試援例爲國子生自其曾祖以來以善治田起
家迨君益饒足慷慨好施無達於財而勇於義乾隆一

十年歲祲君出粟賑貸規爲厝注竟事靡勸容全活無
算嘉慶九年大雨水饑民將四出剽掠已而安堵如故
亦由君倡議城中殷戶就近畫界平糶鄉民丐貸則責
成田主各視其佃租入之數以爲差蓋其行義如是君
內行淳至撫長其弟虞獻之孤達亦以田雄於縣達旣
仕而卒又命子恕撫其子如己之所以撫達者待女兒
弟恩意周浹於戚黨親疎無間言余宦遊久未及識君
顧嘗聞君有園在松江北郭外水石清華林阜參錯蓋
元倪高士之所嘗棲息而又明范太僕歛園故址所謂
聽竹軒者也余方擬乞歸與惕甫爲汎泖之遊一造君

之廬而君竟不待以歿人生一出處遊息豈亦有數存乎其間而余乃僅因惕甫之屬而表君墓耶君以達

貶封奉直大夫配楊繼陳 贈宜人皆先君卒子五忠附貢生前沒楊出次卽恕附貢生候選同知慈監生職太常博士懋監生皆陳出惠側出女三所歸多士族孫男六長文偉恕出後忠爲冢孫次彥博敬彝中敏敦儒仲方宗憲孫女九

安隱君墓表

隱君姓安氏諱泉字鳳林號惠生世爲無錫膠山垵邨
里人今析治爲金匱人明正德間有諱國者以行義聞
於鄉博學好古世尤推重子如山貴贈戶部員外如山
官至四川僉事有治績僉事生子曰希堯太學生太學
之弟曰希范則東林諸君子所稱我素先生也太學生
子曰紹祖光祿寺丞光祿無子以弟紹芳子珩後之紹
芳爲邑中高才生以詩及書畫名天下珩太學生舉鄉
飲賓是爲隱君高祖曾祖恩貢生敏祖鎮本生祖鎮考
育聲自膠山遷居城東之五箭河隱君少讀書家甚貧

既長習醫術靈樞素問諸書無不窺兼工瘍醫爲人處
方應手輒效以是名日起四方之就醫於隱君者戶屨
恒滿河濱則舟相接也而隱君勤勤濟人遇貧乏則徒
步攜藥往治不責報人愈德之旣而家漸裕拓其廬曰
飛香圃春秋佳日雜植華葯購買古書彝鼎及先世翰
墨藏弄其中繙閱摩挲以爲樂偶涉筆爲小詩皆得天
趣烏虜隱君其真隱於醫者與隱君爲人伉爽有至性
急義問不內顧羸紬余先世爲安之自出先曾王母鮑
太夫人與隱君祖母爲女兄弟以是隱君習於吾家余
少時亦時過隱君之廬而接其言論故余之知隱君爲

詳隱君娶華氏昆明女性勤儉善持家後隱君數月卒
子恩桂官桂益桂鎧室張出承桂陳出女適丁士榮亦
張出恩桂能世業娶龔氏生靖詩禮詩金匱縣學生有
文行孫女二曾孫培芝保芝隱君卒以乾隆四十四年
己亥八月八日年六十有三以嘉慶二年丁巳十月二
十一日葬塋都二祖塋又閱十有九年而余始爲之表
其墓且題曰無錫安隱君之阡蓋無錫之有安氏名甚
著故仍舊稱云

潘隱君墓表

松江有隱君子曰潘君雯青有才諳而以足疾廢無所
施於時嗜古篤學克昌其文年六十九以壽終其孤銓
等將葬君於婁縣中皇字圩之原旣屬長洲王惕甫銘
其墓而丐余一言以文其塋道之石君諱兆鸞雯青其
字其先出余同郡宜興潘故宜興著姓明季諱忠之者
始遷蘇州之洞庭山後由洞庭遷松江之華亭今爲婁
縣人祖天爵國子生祖妣朱父佐軋妣亦朱氏君生而
後其從父佐坤遂事所後母葉至孝甫五歲患輟腿疾
遂不良於行性穎敏好讀書稍長棄舉子業畢力於詩

古文辭兼通醫卜以所後母節行白於有司得請

旌如制旣謝人事閑戶獨居嘗築別業石湖塘上種蔬
植竹彈琴煮薺尤喜蘭藝數百本因以蘭咳子自號云
君家故豐以行義聞於鄉里如歲饑出粟抹荒以及施
衣施櫪施醫藥置田贍其貧宗人多豔稱之余獨以爲
樂善好施子不遜其財以暨於人今之富人嗜義者猶
或能之惟君雅尙高潔無聲色狗馬之娛而家所藏弄
祇漢唐以來金石碑板文字及古鼎彝之屬耽研經史
著述甚多殆有隱君子之風惕甫銘墓比諸皇甫謐習
鑿齒抑余亡友吳侍郎稷堂嘗題君六十小像以爲襄

陽之後身蓋所以推重君如是君娶馮氏子五鉅殤次
銓候選州同知鎬國子監生鏞鑑皆餽於學而鏞今以
訓導需次女二一適舉人黃桂一適上海學生沈光溶
孫男八卒以嘉慶二十年七月五日余向慕華亭古心
沈翁之賢而未識也今年春余游雲間而君亦已歿顧
兩翁者余皆得爲文以表其阡其因緣亦有非偶然者
與君所著有書畫錄四卷續錄一卷存疑一卷適安消
夏錄四卷醫方輯驗四卷多識錄四卷例得備書

何君墓表

何君元長以醫名於吳中嘉慶四年嘗識之杭州余齒
髮就衰將以明年歸老就君之廬治余夙疾而其孤其
偉以狀郵京師則君已前沒悲夫君姓何氏諱世仁字
元長自號澹安青浦人其先自宋朝奉大夫滄扈蹕南
渡家秀州之青龍鎮傳三世至侃淳安主簿始以醫著
明初有天祥者楊鐵崖爲作壺春丹房記人稱世濟堂
何氏天祥元孫舉人全正統中官御醫以忤逆璫歸全
子鳳春由諸生掌太醫院事鳳春元孫應宰舉鄉飲賓
並世爲御醫應宰子汝闕入

本朝始不復爲官而仍以其術活人有孝行入祀鄉賢是爲君五世祖會祖炫貢生博學工文其醫術見通志祖王模諸生自明初以來凡再遷而居今青浦縣之簞山父雲翔國子生亦善醫君少孤而大父猶在仍以醫術授君君性好讀書及書畫篆刻初不願爲醫旣以家貧始潛心爲之遂盡善其技節鉞大府衣冠勝流咸欲得君下至徒隸走卒爭轅其門君悉子之方以是以醫名者逾三十年人比之蘇郡葉天士薛生白兩君方余之識君也余權臬事於浙而前按察陸君璞堂病劇未歸璞堂與君同里聞延君治之余問曰璞堂病何如君

曰無妨但氣已索尚可活四五年耳時余患肝疾氣逆
內自危並屬診視則曰公命脈甚長非陸公比璞堂歸
果逾四年而沒而余至今無恙其後余里居聞君名益
噪有族母病請他醫治不效君爲處方輒效余以是益
服君術之神君有圖當代名公俱爲題咏錢少詹辛楣
先生屬余題之然君與余僅在杭州一識面而已君貌
脩偉盎背赤髭目閃閃有光最善古人望聞之法決生
死多奇中諸見吾友王惕甫撰君傳中不具書書余之
所得於君者如此君旣爲名醫所得四方酬幣累鉅萬
而生平好施與隨手揮霍余在廣州陳華南寄陳忠裕

公集至曰此吾鄉何元長刊刻者蓋其能表章前哲又如是君國學生候選布政使理問不樂仕進嘗奉母築室縣之福泉山種花蒔竹自號福泉山人嘉慶十一年八月廿七日卒年五十有五今以某年某月某日葬於某鄉之某原君娶王氏處士學棖女子四長卽其偉嗜學敦行縣學增廣生其瑞其章縣學附生王出其順監生側盛出孫四寶林寶鏡寶瓏寶堦所著有醫案二十四卷治病要言四卷銘曰

君好詩書乃以醫名通紹先業其術益精古人有言願爲良醫君所全活亦既有施識君杭州繼題君像今表

其藏君已長往烏序

都察院左都御史東屏周公墓志銘

都察院左都御史東屏周公以嘉慶十四年十一月九日卒于京師邸第閱明年二月其孤廷授等將御匱歸葬涪州先期乞余文其墓石余嘗與公同官御史臺意氣甚洽知公爲深其曷可以辭公諱興岱字長五一字冠三號東屏先世爲楚之營道縣人明初自麻城遷蜀居涪州高祖茹荼湖南路總兵官曾祖儼康熙庚午舉人祖珙康熙辛卯舉人湖北漢陽縣知縣自高祖以下並贈光祿大夫工部尙書父焯乾隆丁巳進士歷官兵部尙書贈太子太傅諡文恭妣文氏方氏俱封贈一品

夫人公兄弟七人行二方太夫人出也生而穎悟七歲入塾讀書過目成誦體貌端嚴如成人既長從錢塘陳星齋先生學先生雅重公庚寅舉於鄉辛卯成進士改翰林院庶吉士壬辰授編修丁酉充順天鄉試同考官癸卯充山東鄉試副考官甲辰文恭公薨于位扶櫬回籍丁未服闋補原官戊申擢右春坊右贊善己酉轉左春坊左贊善遷司經局洗馬充陝西鄉試副考官旋授右春坊右庶子翰林院侍講學士視廣東學政辛亥擢內閣學士兼禮部侍郎癸丑還京充會試知貢舉武會試總裁甲寅充湖北鄉試正考官乙卯遷禮部右侍郎

充順天鄉試監臨武會試總裁入直南書房丁巳轉
禮部左侍郎充順天鄉試監臨己未調吏部右侍郎兼
管樂部事務轉吏部左侍郎祭告川陝嶽瀆庚申調戶
部右侍郎辛酉充江西鄉試正考官壬戌降補翰林院
侍讀學士癸亥以病乞休復授編修在

實錄館行走乙丑擢翰林院侍講旋授內閣學士兼禮
部侍郎充

玉牒館副總裁擢兵部右侍郎戊辰充會試知貢舉尋
授都察院左都御史充殿試讀卷官武會試總裁方
公在內廷以詩文受知

兩朝賞賚優渥逾於常等其奉

命祭告嶽瀆時秦蜀賊方張四出林劫脅從甚衆

上不忍槩予殊死

命公宣布德意貫其罪慰諭父老毋遽播遷失業聞者
皆感泣民以安堵過家上冢一如文恭祭告故事閭里
以爲榮所過州縣見事有不利于民者輒移文地方大
吏諗而撤之蓋公居平勇于任事以身在 禁近雖時
有陳奏無所施于政而懃懃於奉使之日留心民瘼如
是殆亦庶幾古大臣之風與無何以微青降職蹟而復
起陟長風紀或以爲文恭在 尙書房久

上眷念舊學推恩以及於公不知公方正嚴毅始終卒
被

知遇余交公最晚公顧數數過余且嘗同有事于通路
相見卽論及當世之利病生民之休戚人材之邪正偏
偏不阿其造膝所陳外人無從而知而聽其議論是是
非非較然不欺其志亦可以知公之爲人矣公卒時年
六十有六娶杜氏

誥封一品夫人工部主事鶴翽女有賢德先公一年沒
子二廷授二品蔭生工部屯田司主事廷掄太學生女
三適吏部驗封司郎中前監察御史張問陶江西候補

縣丞林蕃舉人王賡孫九人克寬克敏克惠克勤廷授
出克家克恭克信克讓克仁廷掄出孫女三人銘曰
偉矣宮傅拔起涪水象賢有子克此厥美蜀山巖巖蜀
江瀾瀾靈旂歸來幽宮在茲公所表見僅止於斯我銘
其藏增余累歎

江西督糧道晉封兵部左侍郎懋堂初公墓志銘
嘉慶十二年五月三日江西督糧道封兵部左侍郎懋
堂初公沒於京邸子巡撫君自皖江奔公之喪以是年
某月某日葬公於宛平縣西山之某鄉某原屬余爲文
誌公墓按狀公姓初氏諱之朴字某懋堂其號萊陽人
大父瑄縣學生贈榮祿大夫兵部左侍郎祖妣沈氏贈
一品太夫人父元方乾隆己未進士官河南靈寶縣四
川宜賓縣知縣候補同知授奉政大夫累贈榮祿大夫
兵部左侍郎妣左氏贈宜人累贈一品夫人公爲宜賓
公長子少穎異有絕人之資隨宜賓公游中州川蜀間

八
山
上
卷
之
一
三
宜賓公仕宦連蹇皆賴公左右揶拄之旣而入貲爲兵
馬司正指揮遷戶部貴州司主事督太平大通橋倉再
遷雲南司員外郎出爲江蘇知府補潁州府知府尋調
九江改南昌擢江西督糧道逾年引疾歸歸而卜居京
師之宣武門外凡十有六年而卒年八十有一公之在
九江也九江濱大江民俗險健案牘旁午公廉知地方
訟師匿跡鄉曲比蠹胥恣爲奸利嚴捕之患始除又有
桑落洲者土肥而數被水公率所屬蠲金築隄工竣其
地悉成膏腴百姓感之比調南昌事務叢奏它郡事之
上於大府者皆辦治於首郡公懲揣摩遷就之弊無所

同互用得平反諸獄治稱最

朝廷久知公將不次擢用而甫遷糧儲不二年遽以病告蓋其知進知退又如是公旣久仕復卜居京師常私念鄉里過家上冢唏噓號慟淚爲之枯居平友愛兩弟其先世遺業及公節縮廉俸所餘並三分之不以私也顧余所以重公者公雖棄官而巡撫君方嚮用爲臺諫卽伉直有聲由京卿洊歷封疆以激揚清濁爲己任迨因事獲譴卒荷

聖天子宥其青而復用之其出撫皖江以公及太夫人俱年高將陳情請留公諭以報

國大義趨赴官不數月而公沒而巡撫君守其素志遇
事不撓蓋皆得於公之教此則公生平未究之志所以
付之巡撫君者余于是歎公爲不可及已公娶孫氏封
恭人晉一品夫人縣學生懿洪女子二長卽巡撫君彭
齡乾隆庚子進士歷官安徽巡撫次喬齡乾隆丁未進
士翰林院侍讀孫名浚監生名巖肇辛監生早卒在辛
曾孫榮慶譽慶孫女六銘曰

有渰寸膚亦既有施位不配德止於監司不究於躬厥
後克詒嚮用眉壽子孫祁祁以銘宅兆我言匪私

陳州府知府約堂陳君墓誌銘

江右士大夫家以服習仁義孝友敦睦著聞者稱新城陳氏予聞之亡友魯絜非云絜非女兄歸於陳爲太守約堂君配絜非嘗銘其女兄墓盛稱其賢而約堂君又賢也君子編修用光習於子屬聞君訃將徒跣歸里卜葬君於某鄉某原而先期泣請予爲墓石之文按狀君諱守詒字約堂號仲牧一字種木新城人曾祖以汧贈朝議大夫祖世爵贈資政大夫講宋儒之學世稱凝齋先生父道乾隆戊辰進士贈光祿大夫妣楊氏贈一品夫人是生君光祿有子五人君其次力學不讐入貲爲

兵部武選司員外郎監督南新倉遷車駕司郎中調大
通橋監督時花戶貧乏爲奸利君廉知其實廼出私財
貸之而嚴法持其後由郎中授潁州府知府調太平君
爲治有遠識持大體先後大吏適多賢者交相推重將
薦擢而君丁內憂歸服闋補陳州府知府會楚北教匪
逼潁州毗連郡境君嚴防守習團練賊不敢犯未幾移
疾歸竟不出其在京師買宅一所爲黎川新館館其邑
中之計偕者又嘗雪中同仁和孫文靖夜坐文靖有寒
色君曰吾輩擁爐持酒尙不可支其荷戈露處者宜如
何蓋是時甘肅冒賑事覺官吏減死投荒家室仳離君

故言及之遂偕文靖出囊金爲計盡悉歸其孥旣歸倡
建議倉於各村莊備水旱割宅居蔣心餘侍御而經紀
其友武寧汪輦雲之喪葬之新城而撫卹其妻子臨川
令莊櫛以非罪廢黜爲蠲貲復官君以伯兄亡家居奉
母者十五年太夫人好施予君益推擴而善成之伯兄
以宦破家君兄弟旣析產矣復與諸弟謀均其產以助
伯兄諸弟皆如約蓋君之行義無間內外者類如是君
沒以嘉慶十四年十一月某日年七十有八配卽魯恭
人候選訓導淮之女子男六人長卽用光辛酉進士翰
林院編修次某某女二人適某某孫男十有二人某某

曾孫四人某某銘曰

少力於學而無所試。假途以趨。彊而始仕。歷二千石。既有聞於時。而不獲大其施。詩書之澤。後昆是詒。庶無憾於泉原兮。噫。

候補知府從祖介菴公墓志銘

乾隆二十三年從祖候補知府介菴公以耐圃府君仰荷

高宗純皇帝予祀雙孝祠并

親灑宸翰書孝友傳家四字以賜公旣建綽楔旋詣

闕陳謝

天語垂詢溫霽有如此蓋伏遇

鑾輅時巡屢幸惠山之寄暢園公承先志恪膺將事

天子以是知公常能舉公姓氏公雖絰名仕籍未嘗一

日在官而累叨

八四ノノ系三三
恩渥錫予便蕃特頒

御臨蘇軾冲卿帖重刻淳化閣帖數種琳瑯照耀輝映
山谷真千古不可得之殊遇也公諱兆雷字豫吉介菴
其號系出宋贈龍圖閣直學士淮海先生曾祖海翁公
諱德藻

贈光祿大夫刑部尚書祖諱松期蒙城縣學訓導鄉飲
大賓父諱瑞熙卽耐圃府君歲貢生皆以公

贈中憲大夫妣周氏生妣華氏皆

贈恭人公少攻帖括屢踏省門詭得復失援例授職知
府席先人餘蔭家世豐而循謹如寒素事親以誠事諸

父以禮雖終鮮兄弟而自同曾祖以下諸昆季凡數十
指親厚靡間竟其身無違言耐圃府君工畫法所居春
星草堂圖史雜陳公常侍側有條閒之致比構新宅府
君沒公事務填委猶以其暇憑閣據几默坐如定僧蓋
公意趣澄寬如此寄暢園者先中丞公別業也歲久弗
治耐圃府君鳩而新之以迓

車駕之臨其左卽雙孝祠以祀明孝子諱永孚仲孚及
配享諸先公者也耐圃府君旣奉

特旨入祠公乃割產二百畝爲奉祠田而以其贏葺治
園亭永永無廢是則公事之大者他如修墳塋睦宗郇

小南山人集卷之二
四
賙鄰里其沒也人皆灑涕曰善人亡矣然在公爲細行
不具書公于瀛爲近支又與先大夫少同塾瀛從先大
夫常謁公于新居之梅花書屋見公顏色和易煦煦嫗
嫗談瑣屑事輒刺刺不休先大夫坐輒移晷而瀛亦不
忍舍以去旣退先大夫每爲瀛道公之爲人今公沒垂
二十二年而先大夫之沒亦久矣烏庠是可感也公之
沒以乾隆四十五年正月九日年六十族人籲請學使
者亦奉公主入雙孝祠配楊氏

封恭人太學生師洛女性淑嫗終身無疾言遽色尤持
儉德後公二十一年以嘉慶七年十月四日卒年八十

子六人恭人出者某某側出者某某女子三人適某某
孫某某銘曰

生無位於朝。其道未光也。沒有聞于人。其德已被于一
鄉也。雙孝之後。澤孔長也。穀貽子孫。有慶有章也。

山東濟東泰武臨道叔父蓉莊府君墓志銘

嘉慶十七年歲值壬申四月六日從弟江等奉余叔父
蓉莊公暨楊夫人之喪葬於吳塘門之原時公歿既五
年矣公諱震鈞字西經號蓉莊遠祖爲宋贈龍圖閣直
學士淮海公諱觀曾祖贈中議大夫兩浙江南都轉鹽
運使燈巖公諱松岱曾祖妣邵氏贈淑人本生曾祖左
春坊左諭德贈光祿大夫刑部尙書對巖公諱松齡本
生曾祖妣吳氏華氏並贈一品夫人祖贈榮祿大夫兵
部右侍郎詔菴公諱實然祖妣鮑氏贈一品夫人考贈
榮祿大夫兵部右侍郎溪隱公諱春田妣呂氏黃氏並

贈一品夫人溪隱公生子六人長爲先贈公世萊府君
公行四黃太夫人出年二十二入太學乾隆丁丑

高宗純皇帝南巡公恭錄

御製賜寄暢園詩及前人詩文彙爲一冊以進蒙文綺
之

賜己卯庚辰屢應南北闈試不售遂入貲捐縣丞戊子
夏溪隱公患瘍疾公在外得家書馳歸亟進葠藥晝夜
調護與先贈公及諸叔父禱於神溪隱公危而復甦庚
寅簡發東河縣丞逾年借補臨清州州判甲午夏權臨
清州知州事八月二十九日突聞堂邑張四孤莊民王

經隆壽張民王倫同時反張四孤莊毗連州境公同副將葉信率兵役夜馳往經隆已逸去獲其黨男婦二十二人尋知壽張已陷亟歸防守州故有舊城居民稠密而城久圯公令遷積聚匿老弱申請巡撫速撥兵救援而自詣磚板閘斷橋撤各口渡船昇關稅銀置城庫隨以土塞東西北三門團民勇與文武官吏分堞嚴守部署甫定賊至攻南門前行十數婦女手搖白扇口喃喃又數僧仗劍執旗作指揮狀公用法破其術城退焚南門掘壕作地洞勢甚急公遣人縋下城隱於城扉用刀鉤傷賊足城上齊施鎗箭致死力賊復退用牛車載礮

西走諸生馬毓嵩等各輸米麥供軍食公亦捐錢及棉衣犒之越日賊又至攻西門各負稽燃火火光射門隙如電公令拆月城廟宇填城分隊潑水以壓火賊旋遁然是時賊衆已據舊城其輜重皆編筏渡河而逆首王倫占大寺以居新城困守十數晝夜一切都盡尋有矢著城幕公探知西南隅有高樓與城等亟焚之賊數十出拒奪其器械而還無何賊攻南門挽大車貯轟藥覆秫稽積與城埒將以燒城公趨命拆城上夾牆擲磚石以塞其道頃之城下磚石積尺餘輪碍不得進外委紀雲端以棉裹火藥拔帽緯束之箭頭引以線香再發中

其後車須臾火起賊喪膽棄車走斃賊六人曾大學士
舒公領兵來勦賊公亦奉

旨擢臨清州知州二十三日大兵至是夜大霧哭聲震
野數千人奔城下乞命官軍疑爲賊將發鎗炮擊之公
曰坐城下者皆好百姓議開門納給以食全活無算越
五日王倫焚死舒公入城疑公不能辦治善後諸事奏
請以知州銜管肥城縣事公遂之任肥城明年四月赴
部引

見蒙

召對垂詢臨清防禦顛末得

八
卷二十一
聖
旨卽以知州題補丙申

聖駕南巡至臨清嘉公功著遇缺卽用旋補平度州知
州庚子十月陞甘肅西寧府知府公以親老仍留州任
屬有無名男子死驗之面無皮遍體傷痕無識者或言
似楚某衣履公偵知楚與曹某有隙密赴曹家得其血
跡一訊而伏壬寅遷臨清直隸州知州癸卯二月擢曹
州府知府四月溪隱公疾終濟南越月御匱歸黃太夫
人又以甲辰正月九日沒丙午服闋補甘肅平涼府知
府平涼當孔道地瘠困供億公躬行節儉整飭驛政月
吉進百姓於堂詔以力田孝弟復捐廉偕平涼令龔景

瀚葺文廟及柳湖書院皆有文記事辛亥正月陞陝西
督糧道閱四年遷兩浙江南都轉鹽運使在事一年與
鹺使忤告歸鹺使亦敗歸逾八年出爲山東濟東泰武
臨道時河南漫口溢及所屬州縣公首請賑卹並堵築
張秋堤岸列渡船二百餘爲絳道糧艘以濟丙寅冬署
按察使事巡撫以公督運事上

聞加三品頂戴丁卯秋以公事往來東昌濟寧間得疾
以十月二十日沒於官解年七十有三公先授中議
大夫晉階資政大夫分守山東濟東泰武陵道加四級
崇祀鄉賢祠配吾叔母楊氏封淑人晉封夫人贈奉

直大夫某女以嘉慶十六年二月八日卒年七十有四
子四江國學生議叙州同知泳附貢生沅浙江候補知
縣皆楊夫人出澧側李出女一字嵇某側毛出孫廷杰
蔭生雲南師宗縣知縣廷懋湖南候補縣丞廷栻廷槐
廷棟廷榮廷寅孫女七曾孫三世勲世熙世燾先是溪
隱公嘗創置贍族田三百畝公增置七百畝建義莊於
第六箭河又修累世祖墓守墳者給以米麥其他居鄉
善舉不可殫述公少工書雅愛翰墨嘗恭臨

御賜三希堂帖并搜錄宋元來名人墨蹟鐫帖十二冊
銘曰

繫公治績亦孔之彰德澤所被見於家邦著蔡僉吉嘉
原允臧夫復何憾盡然神傷嗟我諸父後先殂亡老成
不作漫洩北邙

、寧夏府知府蘭士何君墓志銘

君姓何氏諱道生字立之號蘭士又號菊人靈石人附貢生贈戶部主事世基之孫翰林院檢討封戶部郎中思鈞子妣王氏梁氏並贈恭人張氏封恭人君梁恭人出也幼有異稟善讀書與其兄今廣西太平守研農並知名乾隆四十四年舉於鄉逾年偕研農同榜成進士授工部主事累遷本部員外郎郎中以嘉慶二年擢山東道監察御史四充順天鄉試同考官四年冬召見於

乾清宮尋奉

命巡視濟寧漕務五年授江西九江府知府六年以疾
告旋丁外憂歸八年服闋授甘肅寧夏府知府以十一
年七月十八日沒于寧夏年四十有一君鏤礪名節襮
順內方和易退讓而嶷嶷有立其視東漕撤供帳絕苞
苴清操甚著比守九江湖北方用兵軍書旁午俗凋敝
素號難治君銳意振刷以勞瘁得疾及再起莅寧夏邊
郡繁要欲有所設張屬以假銀案解職聽勘久之得雪
又以與新臬使有連當迴避而病遽不起君以

覃恩授中憲大夫娶陳氏封知府思賢女封恭人子五
長熙績次耿繩俱國學生女五長適陳映暉次字楊寶

元餘俱幼孫男四福星福寧福雲福安孫女二先是君之喪自寧夏歸京師今其孤又自京師歸葬君於靈石以余知君乞爲文銘其幽君篤于學尤肆力于詩漢魏三唐靡不窺其堂奧而得力在眉山劍南之間刻有方雪齋詩集君少余二十有三歲余因長洲王惕甫以識君嘗招同蒙古法時帆閩縣龔海峰睢州王霽山陽湖洪稚存及惕甫與君集余京師寓齋之數君者皆並世有聞海峯九魁橫有經濟才十數年來霽山海峯相繼沒君年最少又繼之上年稚存亦亡惕甫家吳門無仕進之志而時帆與余皆以病乞身今銘君墓于平生舊

故聚散存沒出處之際亦重可悲矣銘曰

少捷南宮多才且賢官二千石不羸其年人之于世莫
不有死君壽胡姬中道而止喪車西邁暮雪蒼涼鬱鬱
松楸其潛其藏

工部主事陳稽亭墓誌銘

余在京師聞工部中向有三君子曰棲霞牟松巖昌裕陽山鄭貫亭士超及元和陳君稽亭三君子者余皆與往還而於稽亭尤習松巖貫亭先後遷御史以歿而稽亭爲額外主事者十數年不得志浩然而歸逾年余亦自京師歸而稽亭已前一月逝矣其孤德勉等將葬君于硯山祖塋之次而先期來無錫泣請余銘其墓按狀君諱鶴字鶴齡又字馥初稽亭其號明成化宏治間有諱璫者官南京都察院左副都御史與吳文定王文恪善以直節著是爲君十一世祖本生曾祖樹珏諸生積

學勵行鄉黨所稱獨行君子者也祖燦張增貢生妣沈氏張氏本生祖燦策妣胡氏父廣勤諸生早世未娶以序立君爲後本生父曾懋亦諸生妣郭氏唐氏自祖及本生祖而下並遇

覃恩贈奉直大夫妣皆贈宜人君唐太宜人出也生而穎悟始能言卽能讀杜詩稍長爲文輒工旣出後家難遽作貲產蕩然尋丁本生父憂哀毀骨立雖降服終三年要經不除年二十五補博士弟子員有名嘉定錢竹汀先生大昕雅重之乾隆壬子舉于鄉以第四名魁其儕時年已三十六矣將應南宮試以大母春秋高不欲

行大母強之行報罷歸而大母隨歿哭踊盡禮丙辰成進士以主事用在工部虞衡司行走告歸居於家者一年丁巳自家入都庚申學習期滿得

旨留部而君又歸壬戌再入都而余以乙丑冬因蔡御史維鈺以識君君操行修潔不屑奔走競進出無車馬入直則假之於人其于人亦落落寡諧交遊自松巖貫亭而外不過數人而余以居相近越宿必過君君亦樂就余門巷蕭然僅蔽風雨居平不肯受一無名錢惟以教授生徒自給君於余遇事侃侃直言輒以古人相規切余媿君君不余媿也松巖貫亭之沒君臨其喪哭之

慟其歸也。余送之。猶以兩君表墓之文相屬。余未及爲。而今乃先銘君之墓。悲已。君善爲古文辭。熟悉史事。而於前明治亂得失尤留意。嘗仿李燾長編體例。欲勒成一書。垂成而沒。沒以嘉慶十六年四月九日。年五十有五。娶朱氏。贈宜人。繼娶汪氏。封宜人。俱先卒。子四。德勉。朱出。德範。汪出。德沅。德聚。側王出。女五。陶璐。錢師。慎其。婿也。朱出。餘未。字孫男二。克家。正家。德勉出。銘曰。

烏虬志足以立事。行足以勵俗。無所施於時。而天又奪之。促嗟人命之靡常。莫不有生而卒。歸於無何有之鄉。緊斯人之云亡。不獨爲斯人傷。而有感於世道之茫茫。

禮部員外郎前監察御史謝君墓志銘

嘉慶元年監察御史謝君薌泉方巡視東城時某公爲滿洲大學士權方盛其妾弟與其家人乘車違制譴於道過者辟易君見而擒訊之其人恃勢無狀君立燬其車將窮治之越二日有劾君者竟由是罷職君湘陰人諱振定字一齋號薌泉其先由江西吉安遷湖南祖如渾恩貢生父再詔舉人兩世皆以君官贈朝議大夫妣劉氏贈恭人生君兄弟五人君其季也少穎悟十歲已讀十三經善屬文弱冠爲諸生名籍甚乾隆四十二年舉於鄉四十五年成進士改庶吉士尋以父喪歸復丁

母憂五十二年授編修五十三年充江南鄉試副考官
五十九年改江南道監察御史旋巡視南漕事竣越五
月復有巡城之

命以燬車事落職君遂出都徧遊東南諸名山亦又肆
力於詩古文學益進嘉慶四年九月

上特起君爲部主事補禮部儀制司主事九年充陝西
鄉試副考官遷員外郎十一年授通州坐糧廳邇年而
病以十四年五月十五日卒於京師年五十有七君勤
於職業務持大體其視漕瓜儀也糧艘因隕風不能發
君默禱於神風轉盡得濟請於

上建風神廟自後君渡江輒得順風京口人有謝公風
之稱及爲坐糧廳時倉務叢弊久君裁革陋規諸所厝
注不激不隨會夜半火發於漕船甚熾君親赴救火遂
息性忼慨好談時務其由起廢用爲部主事時嘗應

詔條陳數事居平與人議論觥觥嶽嶽不屑苟同以徇
俗遂能跼籍貴勢有所著聞於時而於詩文尤篤嗜每
以古學衰歇見儕輩中有能爲古文者輒手錄其文而
存之余向未識君君罷官後遊杭州過余余觴之湖上
始與論詩旣見余古文乃大推服其後余自粵東入爲
卿貳得常與君聚以是深識君之爲人君娶周氏太學

生某女封恭人子興曉舉人興垣太學生興堃殤女一適李家茂孫二興曉等將葬君於某鄉某原而乞余銘其墓余故就所知於君者書之君所著詩若干卷文若干卷俱未刻銘曰

有眈者虎忽攫其怒狺狺之口遂鍛其羽繫天日之照臨兮魑魅遁藏度有爲於斯世胡年命之不長嗟斯人之云殂吾將致憾於彼蒼

葉白湖墓志銘

慈谿葉君白湖以詩古文辭雄於浙東年六十有二而
沒葬有日矣其孫某不遠千里先期來無錫泣請於余
丐爲銘幽之文按狀君姓葉氏諱燕字載之號次菴又
自號白湖其先系出括蒼宋慶厯間有諱世儒者官明
州教授攝慈谿縣事遂家慈谿君曾祖諱揚煌仁和籍
廩生祖諱芳盛國學生考諱本中國學生候選州同知
兩世並贈刑部山東司郎中君負異稟少工帖括文字
旣從鄞縣蔣樗菴學鏞游涉獵經史務爲根柢之學餘
姚邵二雲晉涵聞若名時相過從稱爲萬充宗全謝山

一輩人充宗謝山皆甬江前輩中以博學著聞者也逾冠補諸生餼於庠年四十餘始以嘉慶戊午舉於鄉戊辰余在京師君以試事至旣報罷因其弟比部煥以識余余先見其詩又見其所爲古文辭以爲姜湛園後一人遂與還往閱三四日君必過余卽君不至余必過君其明年君應禮部試復紉余以君多病亟勸之歸而君亦自此絕意進取矣無何余亦歸年且七十君渡越江而西訪余於城西草堂握手論文兩日而別別後有人告余君歸過胥江遭風舟幾覆僅以身免而君絕不聞於余越今四年而君沒悲夫君爲人薦倫誼以孝友聞

於鄉里其他行義甚多。惟君以文學重。故不著其鄉舊。有杜洲書院祀童杜洲先生。並黃文潔諸公書院。久廢。君將復之。未果。垂沒。以屬其子君。以舉人注吏部之籍。當得知縣。又嘗入貲爲校官。並不以屑。意竟以舉人終。生平讀書。不守章句。必求心得。嘗謂漢儒之訓詁。宋儒之義理。二而一。會通之。皆可成一家言。又謂史遷班固。初無異同。每以字書近似。沿襲成譌。其議論確鑿。有根據。所著白湖文藁。白湖詩藁。余嘗爲序之。他如讀易千慮。讀嚴氏詩輯。毛詩解。書授讀周禮集解。讀史偶得等書。十數種。皆未刻。娶翁氏。郡學生某女。有婦德。年三十。

卒繼周氏縣學生某女子五人翁出者三周出者二
某某皆諸生女一過餘姚沈某孫五人女孫三人君卒
以嘉慶二十一年二月二十一日以是年某月某日葬
於某鄉之某原銘曰

烏庠君之於世無所施、覃精文字、古是師、富貴福澤天
爲之厄之者、遇昌於辭、君其不泯當在斯。

倪節婦墓志銘

倪節婦姓沈氏華亭贈奉直大夫時英女年二十適同縣倪珠林婚十月而寡誓以身殉水漿不入口者數日其父亟勸之曰而未無子而盡待而夫弟之長生子後而夫而撫之節婦泣諾既而其兄迎之以歸兄卽余向爲表墓所稱古心翁虞揚者也會其夫兄與同祖昆弟訟舅亦就繫家破節婦拮据將荼陰爲護持以紓家難雖依於父兄歲時祀事必躬必親積十有五年夫弟森林生子觀正遂立爲後節婦始還夫家觀正長爲婚娶遂葬其兩世之喪善治生家再起方節婦年五十餘有

可以節行聞於

朝旌門如制長洲王陽甫曾孫爲作家傳謂節婦之在
父家也事父至孝父能治其兄家之事而躬其孤雛以
爲才且賢且謂國風錄宋桓夫人秦穆夫人凡女子之
歸而繫心於父母之家者爲聖人之所取其辭甚辨余
獨以爲婦人之所重者節而苦節尤難節婦身蹈險艱
顛連困踣處患難而不失其正卒成立其子無後而有
後其有造於倪者甚鉅此真寧武子之愚而易之所謂
苦節而孔子所謂歲寒後彫之松柏也節婦卒以嘉慶
二十一年丙子五月年八十有四其明年丁丑二月

正敬啓父兆合葬於華亭縣莘橋莊藏字圩之先塋子
一卽觀正候選從九品娶丁氏繼黃氏孫女一未字銘
曰

孟子有言生於憂患貞臣誼婦其理則均遭家不造爾
心孔艱破巢復完乃卽於安旣永厥終我銘其辰

陳母陸孺人墓志銘

荆溪陳子經喪其母孺人將卜葬於煙山之陽大羅山之原先期乞余爲文誌其墓於是距其父拙齋君之沒四十有一年矣陳子故孝事孺人而其乞余誌墓也又言甚哀不可辭孺人姓陸氏束學諱應仁女年十九歸拙齋君拙齋君家貧喜賓客雍無宿儲賓至治酒肴咄嗟立辦時拙齋君祖母及母俱在孺人佐其姑以事太始太姑沒而姑疽發於背孺人親爲含藥啜其毒疾始瘳比拙齋君病籲於神請以身代竟卒姑痛子甚一夕嚴寒漏數下忽暈絕孺人起按摩達旦家人不知也屬

孺人父文學君亦病每日奔走兩家常兩三反文學君
憐而固止之乃稍閒孺人既爲未亡人督其子讀書成
立教三女皆有家法而御下尤有恩待老僕不呼名撫
媵婢如女及笄具粧奩嫁之習儉勤布衣糲食終其身
經偶製新衣進孺人曰吾姑生平未嘗御是服弗御也
卒以嘉慶十九年四月九日年七十有五子長卽經娶
黃氏次緯未娶而夭女三適丁履安宗如九黃辰耀孫
一嗣達女孫四適儲泰徐萊黃應鰲一字陸茂昌經從
余游善爲詩尤好著書四方賢士大夫多樂與之處品
行高潔不慕榮利人皆以爲孺人有子銘曰

辛苦顛連。其遇屯也。既慈且仁。其行純也。卜焉允吉。堂
斧歸然。以從夫子於九原。

士人之妻母。文中稱孺人。早見於歸震川集。及前輩
大家諸文藁。非從俗也。并記。

張宜人墓志銘

余嘗與長沙周君希甫同官中書余婦朱夫人因得與希甫之配張宜人時相往來朱夫人每爲余道宜人之能而賢今宜人沒於貴州希甫罷太守職來京師將命其子自黔歸宜人之喪而葬之丐余銘其墓宜人姓張氏安鄉人曾祖明先康熙中進士官左春坊左中允祖弧安肅縣知縣父孫錫歲貢生年十九歸希甫時希甫已爲縣學生乾隆三十五年希甫舉於鄉官內閣中書閱二十年始成進士出爲貴州同知遷大定府知府希甫宦迹所至宜人皆從希甫曰乾隆壬寅甲辰間余先

後丁內外艱家貧久不能舉喪會先大夫官浙江時海塘工程醵金責償甚迫益無暇治窀穸宜人顧力贊余宜亟葬而後圖官逋如宜人言竟克葬我先大夫先恭人以庶幾免於罪戾希甫又曰余官京師時弟有蕃年及冠欲遣歸娶力不能具禮且道遠無親屬伴之歸宜人忽自請行假貸得二百金挈吾弟並次兒同歸瀕行篋中金已耗過半抵家後又假貸若干金爲吾弟成禮并爲次兒娶婦蓋希甫之言如是余以知宜人之能卽宜人之賢而余婦所以稱道宜人者爲可信宜人性木彊聞與希甫時不相中及其旣沒希甫爲文述哀語多

惻愴因念余婦之亡先於宜人者十有餘年讀希甫哀
辭輒爲之嗚咽不自禁也宜人卒以嘉慶十四年四月
一日年六十有三封宜人子鳴鸞舉人充咸安宮學教
習鳴鸞副榜貢生娶皆士族女一一幼傷一適洪輔孫
二懋倫叙倫鳴鸞出孫女三人銘曰
其德也豐相夫子以有終其命也窮夫子既黜而逮罹
于凶銘之者其夫子之友以奠冥宮

大定府知府希甫周君墓志銘

嘉慶十七年夏六月余方解職里居長沙周君希甫以候補知府隨宮保百公來江南因公事至吳門過余匆匆別去遂不常見閱二年而君之孤鳴鸞來計則君以嘉慶十九年五月十二日歿於揚州之興化矣悲夫君諱有聲字希甫別號松岡其先自江西豐城遷長沙曾祖贈兵備道炳諸生祖贈兵備道宣智舉人以明通榜官澈浦教諭考克開舉人以明通榜歷官浙江杭嘉湖海防兵備道母張氏封恭人君少通敏善讀書稍長爲文輒工年二十二以乾隆庚寅恩科舉於鄉屢屈禮

部試官內閣中書前後二十年中間以父兵備公公私
逋負繁累困甚復兩遭喪哀毀骨立年四十七始以乙
卯成進士引

見以國子監學正學錄用君官中書久例得奏留屬秩
滿當出爲同知適貴州有种苗之變以直隸州知州入
黔叅軍事在事者皆倚希甫爲重事竣借補鎮遠府清
江通判清江故苗蠻其民困供億幾不堪命君至悉罷
除之府屬之黃平州民與官相惡將爲亂大吏檄君兼
攝之旣至卽置其首於法而撈掠其餘無株累尋調署
思州府知府前守久病不治事有無賴李太王者與其

鄉人劉添貴以墳山構訟李老而狡劉弱不得直君廉得其實出劉於獄以代者至去任復權思南府事思南俗刁悍其治一如在思州時屬隣境銅仁石峴苗變總督魯羅琅公珩帶兵往討募鄉勇得三千人令二千人與綠營兵合統以簿尉千把分守要隘而自帥千餘人馳赴石峴隨琅公擊破苗砦石峴平是年會今江督百公來貴州爲布政使聞君名召之至貴陽而萊陽初公彭齡亦以署貴州巡撫事至遂奏擢大定府知府君之受知兩公自此始兩公旣才君遇有大獄必以屬之君顧時有可否是以兩公益重君時齡楚邊境苗民仍數

出爲患黔楚僉議設碉堡以備苗楚吏言黔之銅仁宜
專備兵爲衛楚中不必更設碉堡君爭之曰銅仁四面
皆楚壤黔有備而楚無備一旦苗迫黔黔固有不利焉
亦豈楚之利乎楚吏無以難卒如君言自此黔楚無苗
患其他遇事識大體率類是尋權貴陽府事有平越州
屬湄潭縣民婦周楊氏者夫暴亡其弟以毒斃兄命控
之縣獄已成君白其寃立脫之無何以失察小錢里吏
譏越二年入醵復官會百公總督兩江以其名入告摯
之來嘗權松江蘇州兩府事未補官而歿年六十有六
君爲吏廉囊無私錢其歿也幾無以爲殮長沙遠在數

千里外亦幾不克歸其喪逾二年其孤鳴鸞鳴鸞始奉
君之柩歸葬於長沙之淳化鄉之新塘坤熊家隴月行
山配張宜人安鄉候選訓導孫錫女先君卒宜人之墓
余銘其墓今君歿其孤又屬爲墓石之文其子姓婚娶
已見宜人墓志銘曰

繫君朋齒多鳴於時君獨連蹇誰爲爲之欲起而踣竟
止於斯君魂其歸湘江之湄我銘其藏我心孔悲

貢生汪小海墓志銘

余衰老杜門海內朋舊凋喪於其沒輒爲銘章以舒余
悲其沒而未赴如桐城姚姬傳海寧周松靄吳兔牀諸
君子皆不及銘而今乃銘小海小海之亡以今年丁丑
秋七月二十有五日其家亦未赴其孤嘉穀方纍然在
疚一日墨經叩吾門持行狀乞銘則小海之亡已六月
余不能臨其喪奚忍不銘小海姓汪氏諱淮號蘭阜小
海其字系出唐越國公華世居休寧明中葉有贈中大
夫諱某者遷浙江嘉興之梧桐鄉今析縣爲桐鄉人高
祖森戶部郎中以詩名刻有小方壺存藁等集本生高

祖諱某內閣中書與弟北城兵馬司指揮某並有詩名
世所稱汪氏三子者也祖諱某吏科給事中事蹟具高
安朱文端墓志祖諱某福建興化府知府考諱某候選
州同知妣某氏生妣某氏小海少岐嶷好讀書博學強
記負過人之資學使武進錢文敏奇其文拔補博士弟
子員旣以父患風痺左右扶掖非小海不懽遂廢帖括
入成均不復應科舉試尋丁父憂又連遭兩妣之喪哀
毀骨立小海遠祖墳塋在休寧越三四年必往省有墓
在中山山水暴漲傷殞官小海議築石塘爲漸費鉅或
難之而小海卒成之其近世之塋於浙者歲時上冢負

土植木佳城鬱然皆立石以誌人多以是賢小海余獨
以小海俶儻不羈似狂高介絕俗似狷此則蔡邕所謂
郭有道無愧辭者也小海一生精力多在詩浙中詩人
矜才務博而小海則興趣閒遠刻露清削所至遊名山
水尤多可傳之作古文簡貴大小令出入姜史書法古
拙交游盡一時名士前輩如王蘭泉大府如阮芸臺兩
公無不稱小海詩小海殊落落其往來無間者余一人
而已刻有自定詩文集二卷持擇最慎余序之汪氏世
錄一卷遷浙世代表二卷傳一卷祠墓考二卷遺書志
一卷黔山紀游一卷其未刻者漫與錄四卷浙東西詩

鈔二十卷、台宕紀游志一卷、湖海瑤華錄若干卷、汪氏詩載二卷、娶王氏某女、前卒、小海自爲之傳、而梁山舟學士書之、予四人、嘉穀廩貢生、候補訓導、嘉植縣學生、誦芬、嘉樂、嘉植、嘉樂皆出爲從父後孫、十八人、曾孫六人、卒時年七十有二、以嘉慶某年某月某日、嘉穀等葬君於海寧之某鄉某原、小海體肥而善飲、其得疾亦以風痺、余嘗過其家、兩人掖而出、語喃喃不能辨、閱三年竟卒、銘曰、

狂也而肆、矜也而廉、古之民與斯人、則兼黃金鑄之、世士所慕、詩骨不朽、斯人之墓。

張姚氏女壙志

張姚氏女者、刑部侍郎無錫秦瀛之長女、適仁和張姚仁、仁沒後五年、而女沒於侍郎之宅、又閱二年、侍郎自京師解職歸、葬女於錢唐城北之原、啓仁兆而合窆焉、侍郎傷女之無命也、爲文誌之、先是侍郎生女、家方貧、女性婉順、諸能承父母志、侍郎暨其母朱夫人篤愛之、旣長、許字仁、仁父成與侍郎同官京師、故相善、女弱多病、年二十餘始成禮、從其翁官於湖南、江西者凡數稔、其翁罷歸、而侍郎適備兵杭州、女仍依侍郎以居、無何翁沒、官逋纍纍、家無私錢、困甚、仁服除、以候補鹽場大

使之四川追侍郎歸自湖南女又挈其子女隨侍郎居無錫比侍郎出爲廣東按察使而仁尋沒於蜀女自無錫遣僕入蜀御仁匱歸時嘉慶十一年二月也而女竟以嘉慶十四年七月二十二日卒年四十有六女幼未讀書而能通曉文義與侍郎家問往來皆自書其右臂不仁則以左書之子一振錫女一許字施有光皆媵華出女撫之如已所生其子女忘其爲非女出也辭曰其性也淳其命則屯仇離顛踣而卒以厄其年余不獲送汝之死而今以銘其原庶以慰汝於九泉

三女墳志

余第三女適嵇文絢以嘉慶十年閏六月二十九日歿於湖北之來鳳閏八年爲嘉慶十八年八月二日余葬之大池之原女余婦朱夫人出也夫人生女後不復舉繇是愛憐甚女性婉順幼誦唐詩略曉大義年十五而夫人歿十九歸文絢文絢故太學士文敏公後未讀書入貲爲小官補來鳳典史來鳳地界黔蜀風土蠻劣女弱向依余以居不欲行其舅姑強之行逾二年竟歿于二汝幹汝驛女歿時兩子皆細穉今汝驛年且十有二矣聰慧露頭角女之死而不死者或在是與女得年僅

二十有七銘之者其父刑部侍郎秦瀛也辭曰
女之歿余爲文哀之而又銘其幽人之生有涯而余之
致痛於女者誠不自知其涕泣之何繇

○幼兒緇承壙志

緇承余妾戴出也。以嘉慶七年正月二十八日生。緇承於湖南按察使署。是日適余六十生辰。因呼之曰六壽。緇承生而多慧。不意其五歲而夭也。緇承歿以嘉慶十一年正月二十五日。時余在京師。不及見緇承之歿也。其生母泥俗例。歿二日。卽渴葬。緇承於惠山之陽。余憐其慧。又哀其夭。懼其孤冢之久而湮也。越四年。改葬之於富安鄉礮石尖。卽余亡婦朱夫人所葬處也。余生壙在是。緇承附於旁。庶緇承之魂魄有依也。烏虜兒之爲吾兒者。止於五年。而其舍吾而去者。終萬古而茫然葬。

兒者兒父也。志兒壙者亦兒父也。兒其有知耶。噫。

原缺

○書歸震川先生集後

有明中葉姚江之學盛行天下之士沒溺於良知之說
靡然從之無異醉高明如武進荆川唐氏論學亦主張
姚江崑山歸震川先生承學於其鄉魏莊渠講道安亭
江上弟子從遊者甚衆諸所論說不肯標榜門戶而其
理一宗程朱可謂卓然能自樹立之君子矣姚江事功
甚偉萬無可議其所謂致良知者亦深痛習俗錮於功
利之見特揭本旨而欲以救時之弊乃宗其說者當時
如黃綰霍韜席書黃家明皆議大禮之小人一傳爲王
龍溪再傳爲何心隱李卓吾之徒狂瀾之倒幾於莫可

究諸先生屏居田野躬古之道不爲時風衆勢所動搖
其爲文章闢深峻潔既別於弁洲之僞製亦不蹈講學
家語錄之習人但知其文似史遷廬陵而不知其所學
之正固粹然無疵也余愛讀先生文因書其後

○書湯潛菴先生集後

湯潛菴先生以明體達用之學發爲文章冲然以夷融然以液余讀先生集竟乃喟然歎曰先生之交有本之言也言之有本如水之有源孟子曰原泉混混不舍晝夜盈科而後進放乎四海有本者如是所謂本者何亦曰有物而已矣物必本於誠誠者物之終始不誠無物先生自嶺北告歸受學於孫夏峯器識闊達而浸灌於仁義道德之旨其再出撫吳也以古人之治治其民去吳之曰吳人哭泣縗留不獲送者數萬人入掌詹事晉尙書爲明珠及其黨余國柱所齟齬同列蕩恐咸爲先

生危先生蹇蹇諤諤獨立不懼不幸遽歿朝野歎息至
今聞其事者莫不惜先生遇之不終而痛恨夫僉壬之
毒害君子蓋先生以忠誠結

主知以誠信孚朋友以至誠感百姓誠能動物至誠而
不動者未之有也先生之文一出於誠惟誠故有物惟
有物故有本先生之所以爲文皆先生之所以爲人而
已先生受學夏峯夏峯之學故宗姚江而先生於朱子
所謂居敬窮理踐履篤實者宗旨仍無稍間其與陸清
獻書反復辨論乃斥夫僞托朱子而誣譏姚江至訐其
陰私不遺餘力者非有所示異於朱子也余故讀先生

交而並著之

夏峯少負奇氣嘗從孫文正鹿忠節遊周旋東林諸君子於患難中不避艱險海內稱之知時不可爲闕其用世之志隱居蘇門滄桑後以遭民終卒時年九十二先生學問經濟能本其所學以見於事爲而世或議其偏於姚江之說並訾夏峯過矣并記

祭李石農撫軍文

烏虜石農亡矣石農不可亡胡一旦奄棄人世而使余爲之盡然而悲傷方聞

新命擢撫滇疆

天子曰都俾臨蠻邦汝舊所治滇人是慶君已疾病遽罹凶殃渺三巴兮星霄果人命之不常上年三月君離五羊旌旆就道過余草堂風雨晝昏握手一觴送君西郭中心恨恨踰褒斜兮劍門指井絡兮天彭雙鯉書至連番累章謂吏道之多疵病已中平膏肓苦同志之寥闕懼獨弦之孤張羌開緘而太息詎永決兮長相望憶

君疇昔司臬點蒼誰致君獄鐵鎖銀鐐寒殿裂膚荷戈

投荒松巖諸子

謂年昌繆侍郎

道周榜徨指天山兮雪皚皚出

玉門兮天茫茫望親舍兮萬里灑血淚兮沾衣裳大興

薦之

謂朱文正

謂君忠良

召之塞外俾治喪而還晉陽服除詣

闕佐漕北倉爰漸涉乎通顯庶吾道兮大光繫斯人之

云俎豈獨余一人之哀感而九迴乎中腸何造物之不

仁故顛倒乎降凶與降祥徇物情之靡靡輒喜柔而惡

剛烏虜石農隻身遠方六十無子誰執君喪烏虜二李

萬夫之綱許齋慘死而君又歸乎帝鄉設位山齋西神

之旁君所嘗遊同余徜徉冀君靈之來茲陳肴核兮羅
酒漿俟山風之蕭寥有怪禽兮嘯松篁噫髣髴兮君詩
盼雁宕兮愁雲黃

石農脩兵溫處時有雁
宕記游詩一卷最工

唐陶山獨坐圖像贊

并序

理學心學岐而爲二此後儒之謬論也白沙於靜中養出端倪甘泉隨處體認天理陽明之致良知其後雖不能無弊要未可以心學少之吾鄉顧高兩先生以復理格物爲務而高子復七規亦主靜坐更不得議其偏也余友唐君陶山歷州縣任繁劇有年日鹿鹿於簿書中而其心盎然其容晬然初不覺人事之足以撓其懷好讀書而不爲玩物喪志施之於政無不釐然具舉蓋惟養之有素心有主宰則見理明而處事當也陶山淡於榮利屢有退志夫澹泊寧靜古人事功皆從此出陶山

惟不屑爲世俗之干進斯其能進而有爲與會陶山以
膺上考來京師出獨坐圖像以示迺爲之贊曰

卽物卽心卽心卽物明心見理是二是一靜而無靜動
而無動以靜制動是體是用